



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05), člana 61. stav 2. Zakona o upravi ("Službeni glasnik BiH", broj 32/02) i člana 21. stav (3) Pravilnika o akciznim markicama za duhanske prerađevine, alkoholna pića, voćnu prirodnu rakiju, kahvu i vino ("Službeni glasnik BiH", broj 50/09), direktor Uprave za indirektno oporezivanje d o n o s i

I N S T R U K C I J U

O PRIVREMENOM IZNOŠENJU AKCIZNIH MARKICA I NJIHOVOG RAZDUŽIVANJA PRI UVOZU AKCIZNIH PROIZVODA

GLAVA I. OPĆE ODREDBE

Član 1. (Predmet)

Ovom Instrukcijom bliže se propisuje pojednostavljeni postupak prijavljivanja privremenog iznošenja iz carinskog područja Bosne i Hercegovine preuzetih akciznih markica namijenjenih obilježavanju akciznih proizvoda koji se stavljaju u slobodan promet na području Bosne i Hercegovine, način razduživanja privremeno iznijetih akciznih markica pri uvozu i stavljanju u slobodan promet akciznih proizvoda obilježenih istima i druga pitanja u vezi privremenog iznošenja akciznih markica.

Član 2. (Mjesto iznošenja akciznih markica)

(1) Akcizne markice namijenjene za obilježavanje akciznih proizvoda, čiji je sadržaj i izdavanje propisan odredbama Pravilnika o akciznim markicama za duhanske prerađevine, alkoholna pića, voćnu prirodnu rakiju, kahvu i vino, mogu se privremeno iznositi preko carinskih referata na graničnim prijelazima u drumskom, vazdušnom i poštanskom saobraćaju, kao i DHL-om i drugim brzim pošiljkama (u daljnjem tekstu: izlazni carinski ured).

(2) U slučajevima iznošenja akciznih markica DHL-om i drugim brzim pošiljkama iste prethodno, radi kontrole u smislu člana 3. ove Instrukcije, moraju biti predočene carinskom uredu preko kojeg se pošiljka s akciznim markicama otprema za privremeno iznošenje.

GLAVA II. POSTUPAK PRIVREMENOG IZNOŠENJA AKCIZNIH MARKICA

Član 3.

(Postupanje izlaznog carinskog ureda)

(1) Prilikom privremenog iznošenja akciznih markica, ovlaštenu predstavnik poreznog obveznika (u daljnjem tekstu: ovlaštenu predstavnik) izlaznom carinskom uredu usmeno prijavljuje privremeno iznošenje akciznih markica, uz predaju četiri primjerka otpremnice o izdatim akciznim markicama (u daljnjem tekstu: otpremnica), koju je poreznom obvezniku izdao pomoćni trezor nadležnog regionalnog centra Uprave za indirektno oporezivanje, te punomoć za privremeno iznošenje akciznih markica ovjerenu od poreznog obveznika i predočava akcizne markice koje privremeno iznosi. Usmena prijava smatra se zahtjevom za privremeno iznošenje akciznih markica.

(2) Carinski službenik izlaznog carinskog ureda provjerava da li su podaci navedeni u otpremnici istovjetni s podacima navedenim na akciznim markicama koje se privremeno iznose, nakon čega, u evidenciju iz člana 8. ove Instrukcije, unosi potrebne podatke, te ovjerava sva četiri primjerka otpremnice na način da na poledini iste, odvojeno kosim crtama, čitko unosi: naznaku "privremeno iznošenje akciznih markica", redni broj iz evidencije, datum i vrijeme privremenog iznošenja, službenu šifru i potpis, što ovjerava službenim pečatom. Ovjera otpremnice smatra se prihvatanjem zahtjeva iz stava (1) ovog člana, odnosno odobravanje privremenog iznošenja akciznih markica.

(3) Jedan primjerak otpremnice ovjerene na način kao u stavu (2) ovog člana, zajedno s punomoći iz stava (1) ovog člana, zadržava izlazni carinski ured i odlaže u poseban registrator po redosljedu datuma ovjere, a ostala tri primjerka vraća ovlaštenom predstavniku.

Član 4.

(Postupanje izlaznog carinskog uredu kod sukcesivnog privremenog iznošenja akciznih markica)

Ako se akcizne markice izdate po istoj otpremnici privremeno iznose sukcesivno (u više navrata), ovlaštenu predstavnik i izlazni carinski ured kod drugog i sljedećeg privremenog iznošenja akciznih markica postupat će na način određen kao u članu 3. ove Instrukcije, s tim da:

- a) ovlaštenu predstavnik predaje izlaznom carinskom uredu tri primjerka otpremnice koja su mu vraćena od tog ureda pri prvom i svakom sljedećem privremenom iznošenju akciznih markica po istoj otpremnici,
- b) privremeno iznošenje akciznih markica izlazni carinski ured ovjerava na sva tri primjerka otpremnice iz tačke a) ovog člana, uz naznačenje i podataka o akciznim markicama koje se privremeno iznose (boja, količina, slovna oznaka serije i serijski broj), nakon čega iste vraća ovlaštenom predstavniku. Privremeno iznošenje akciznih markica izlazni carinski ured ovjerava i na primjerku otpremnice kojeg je zadržao pri prvom privremenom iznošenju akciznih markica po toj otpremnici.

Član 5.

(Postupanje odredišnog carinskog
ureda kod carinjenja akciznih proizvoda)

(1) U carinskom postupku stavljanja u slobodan promet akciznih proizvoda obilježenih privremeno iznijetim akciznim markicama, deklarant uz carinsku prijavu IM4 i ostalu potrebnu dokumentaciju, prilaže i sva tri primjerka otpremnice vraćenih i ovjerenih od izlaznog carinskog ureda na način propisan u članu 3., odnosno članu 4. ove Instrukcije.

(2) Carinski službenik odredišnog carinskog ureda kod kojeg je podnijeta carinska prijava IM4, prilikom pregleda akciznih proizvoda, sravnjuje i podatke o akciznim markicama iz otpremnice s akciznim markicama kojima su obilježeni akcizni proizvodi koji su predmet carinjenja. Ukoliko se stanje slaže, ovjerava sva tri priložena primjerka otpremnice stavljanjem (na poledini), odvojeno kosim crtama: naznake "ocarinjeno po IM4, broj: od godine", službene šifre, potpisa i službenog pečata, od čega jedan primjerak otpremnice zadržava uz carinsku prijavu IM4, a druga dva primjerka vraća deklarantu.

(3) Ako se uvoz, odnosno stavljanje u slobodan promet količine akciznih proizvoda radi čijeg obilježavanja su privremeno iznijete akcizne markice po istoj otpremnici, vrši u više puta, odredišni carinski ured u ovjeri otpremnice na način određen u stavu (2) ovog člana odgovarajuće primjenjuje odredbe člana 4. ove Instrukcije, s tim da će uz carinsku prijavu IM4 (kod drugog i svakog sljedećeg uvoza po istoj otpremnici) zadržati kopiju otpremnice nakon njene ovjere, a deklarantu vraća sva tri ovjereni primjerka otpremnice.

(4) Na način određen kao u stavu (1), (2) i (3) ovog člana odredišni carinski ured postupa i u slučajevima ako se akcizni proizvodi obilježeni privremeno iznijetim akciznim markicama stavljaju u drugo carinski odobreno postupanje ili upotrebu, kao i u slučaju razduženja tog postupanja ili upotrebe.

(5) Vraćene primjerke otpremnice iz stava (2), odnosno stava (3) i (4) ovog člana, nakon stavljanja u slobodan promet cjelokupne količine akciznih proizvoda, radi razduživanja preuzetih akciznih markica, porezni obveznik dostavlja pomoćnom trezoru nadležnog regionalnog centra Uprave za indirektno oporezivanje koji mu je izdao akcizne markice i otpremnicu. Taj trezor, nakon obavljenih provjera kod razduživanja, na svim primjercima, na najpogodnije mjesto na prvoj strani otpremnice, unosi zabilješku o razduživanju, koja treba biti ovjerena potpisom službenika i službenim pečatom, nakon čega jedan primjerak vraća poreznom obvezniku, a ostale zadržava u službenoj evidenciji.

(6) U slučaju primjene člana 22. Pravilnika o akciznim markicama za duhanske prerađevine, alkoholna pića, voćnu prirodnu rakiju, kahvu i vino, uz otpremnice iz stava (5) ovog člana, porezni obveznik dostavlja i neiskorištene ili oštećene markice.

Član 6.

(Popunjavanje carinske prijave)

U polju "31" carinske prijave koja se odnosi na akcizne proizvode obilježene privremeno iznijetim akciznim markicama obavezno se upisuju podaci o slovnoj oznaci serije i serijski broj akciznih markica, zatim svi podaci o akciznim proizvodima (npr. za alkoholna pića postotak apsolutnog alkohola, volumen pakovanja i dr.) od kojih ovisi identifikovanje i ispravno tarifno svrstavanje robe, kao i obračun i naplata indirektnih poreza, dok se podaci o regionalnom centru čiji je pomoćni trezor izdao otpremnicu, te oznaka "OT", broj i datum otpremnice, odvojeno kosim crtama, unose u polje "44" ili u nedostatku prostora u polje "31" carinske prijave (npr.: SA/OT/85/10/08/09).

Član 7.

(Postupanje nadzornog carinskog ureda kod

obilježavanja akciznih proizvoda pod carinskim nadzorom)

(1) Ako se akcizni proizvodi koji nisu obilježeni akciznim markicama stavljaju u postupak carinskog skladištenja u carinskim skladištima ili smještaju u slobodnu zonu, ti proizvodi mogu nakon toga biti stavljeni u slobodan promet u Bosni i Hercegovini pod uvjetom da su obilježeni akciznim markicama.

(2) Obilježavanje akciznih proizvoda iz stava (1) ovog člana se vrši pod neposrednim carinskim nadzorom carinskog ureda koji je nadzorni ured za carinsko skladište, odnosno za slobodnu zonu, ovisno od situacije (u daljnjem tekstu: nadzorni carinski ured), primjenom odgovarajućeg uobičajenog oblika rukovanja iz Priloga 48 Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", br. 63a/04,60/06 i 57/08), odobrenog u skladu s carinskim propisima koji se odnose na postupak carinskog skladištenja, odnosno na slobodne zone.

(3) U slučaju iz stava (2) ovog člana nadzorni carinski ured obavezno sačinjava zapisnik o obilježavanju akciznih proizvoda pod carinskim nadzorom, koji treba da sadrži podatke o:

- a) držaocu, tipu i identifikacionom broju carinskog skladišta, broju i datumu odobrenja o držanju carinskog skladišta (ako se obilježavanje vrši u carinskom skladištu),
- b) slobodnoj zoni, korisniku slobodne zone koji je smjestio akcizne proizvode u slobodnu zonu, broj i datum odobrenja kojem je korisniku slobodne zone odobreno vođenje evidencije zaliha u slobodnoj zoni (ako je u pitanju obilježavanje u slobodnoj zoni),
- c) otpremnici (naziv regionalnog centra čiji je pomoćni trezor izdao otpremnicu, te broj i datum otpremnice),
- d) vrsti i količini akciznih proizvoda obilježenih akciznim markicama, slovnoj oznaci serije i serijski broj akciznih markica, datumu, vremenu i mjestu obilježavanja, načinu obilježavanja (npr. ručno, mašinsko),
- e) eventualno druge potrebne podatke, prema procjeni nadzornog carinskog ureda.

Zapisnik potpisuju carinski službenici nadzornog carinskog ureda i ovlašteni predstavnik deklaranta i držaoca carinskog skladišta (ako on nije i deklarant), odnosno korisnika slobodne zone (deklarant). Zapisnik se radi u dovoljnom broju primjeraka. Jedan primjerak zapisnika zadržava nadzorni carinski ured i odlaže uz odobrenje za carinsko skladište, odnosno uz odobrenje o odobravanju vođenja evidencije zaliha u slobodnoj zoni, dva primjerka se uručuju deklarantu (od kojih jedan prilaže uz IM4 carinsku prijavu za akcizne proizvode na koje se odnosi zapisnik), a jedan primjerak držaocu skladišta (ako on nije i deklarant) kojeg unosi u evidenciju carinskog skladišta.

(4) Nakon obilježavanja akciznih proizvoda, carinski službenici nadzornog carinskog ureda na sva četiri primjerka otpremnice stavljaju zabilješku koja sadrži: naznaku "obilježavanje izvršeno u carinskom skladištu tipa, identifikacioni broj, držaoca, u mjestu, " (odnosno naznaku "obilježavanje izvršeno u slobodnoj zoni, u mjestu,"), podatke o slovnoj oznaci serije i serijski broj akciznih markica, broj i datum zapisnika iz stava (3) ovog člana, potpis, službenu šifru i ovjeru službenim pečatom. Nakon toga, jedan primjerak ovjerene otpremnice zadržava nadzorni carinski ured uz zapisnik, a ostala tri primjerka vraća deklarantu sa kojima se postupa na način kao u članu 5. ove Instrukcije.

Član 8.

(Evidencija o privremeno
iznijetim akciznim markicama)

(1) Izlazni carinski ured dužan je uspostaviti i voditi evidenciju o privremeno iznesenim akciznim markicama.

(2) Evidencija iz stava (1) ovog člana treba da sadrži podatke o: rednom broju, poreznom obvezniku, licu koje privremeno iznosi akcizne markice (prezime i ime, jedinstveni matični broj, broj lične karte ili drugog dokumenta na osnovu kojeg se može utvrditi identitet lica i mjesto izdavanja),

regionalnom centru koji je izdao otpremnicu, broju i datumu otpremnice, akciznim markicama (boja, količina, slovna oznaka serije i serijski broj), datumu i vremenu privremenog iznošenja akciznih markica i kolonu napomena.

(3) Strane evidencije iz stava (1) ovog člana moraju biti numerirane i ovjerene potpisom šefa izlaznog carinskog ureda i službenim pečatom.

Član 9.

(Evidencija o akciznim markicama kojima su obilježeni akcizni proizvodi pod carinskim nadzorom)

(1) Nadzorni carinski ured dužan je uspostaviti i voditi evidenciju o akciznim markicama kojima su pod carinskim nadzorom, u skladu sa članom 7. ove Instrukcije, obilježeni akcizni proizvodi.

(2) Evidencija iz stava (1) ovog člana treba da sadrži podatke o: rednom broju, poreznom obvezniku, regionalnom centru koji je izdao otpremnicu, broju i datumu otpremnice, akciznim markicama (boja, količina, slovna oznaka serije i serijski broj), datumu i vremenu obilježavanja pod carinskim nadzorom, identifikacionom broju i držaocu carinskog skladišta, odnosno o slobodnoj zoni, broju i datumu zapisnika o obilježavanju akciznih proizvoda pod carinskim nadzorom i kolonu napomena.

(3) Strane evidencije iz stava (1) ovog člana moraju biti numerirane i ovjerene potpisom šefa nadzornog carinskog ureda i službenim pečatom.

GLAVA III. ZAVRŠNE ODREDBE

Član 10.

(Prestanak važenja)

Stupanjem na snagu ove Instrukcije stavlja se van snage Instrukcija o izvozu poreznih i kontrolnih markica i njihovog razduženja pri uvozu akcizne robe ("Službeni glasnik BiH", broj 73/06).

Član 11.

(Stupanje na snagu)

Ova Instrukcija stupa na snagu osmog dana od dana objavljivanja u "Službenom glasniku BiH".

Broj: 01-02-2-1701-1/09
Datum: 23.07.2009. godine

DIREKTOR
Kemal Čaušević